

UMchunu usemise umsebenzi kwakhe

MLUNGISI GUMEDE

I-DA KwaZulu-Natal
inxusa uNdunankulu
uMnuz Willie Mchunu
ukuba awudayise
umuzi wakhe
wombuso oseParkside,
eMgungundlovu, osuse
umsindo ngenxa yezinsolo
zokuthi ulungiswa ngo-
R32 million wabakhokhi
bentela.

Umholi we-DA
KwaZulu-Natal, uMnuz
Zwakele Mcwango, uthe
uMchunu kumele awufake
endalini umuzi ukuze
usetshenziswe abadinga
indawo yokuhlala
kakhulu.

I-DA eKZN izolo iye
kulo muzi kaMchunu
iyowuhlola ngemuva
kwemibiko yabezindaba
ethi kubekwe u-R32
million wabakhokhi
bentela ukuze ulungiswe.

UMchunu useyalele
ukuthi kumiswe
ukulungiswa komuzi
waphinde waphakamisa
ukuthi kwenziwe uphenyo
ngenhloso yokuthola
ukuthi besikhona
yini isidingo sokuthi
ulungiswe nokuthi
ilandelwe yonke yini
imigudu yokukhipha
ithenda yokwenza
umsebenzi.

Ngokwemibiko
yabezindaba ukulungiswa
komuzi kuthiwa
kuzodla u-R32 million
kodwa uMnyango
wezokuHlaliswa
kwabantu esifundazweni,
ebolwa uMnuz Ravi Pillay,
uyakuchitha lokho uthi
okwamanje umsebenzi
usadle u-R821 000.

“Lolu phenyo
oluzokwenziwa
luzophinde lusize
ekutholeni ukuthi ngabe
umsebenzi uyifanele yini
imali obekelwe yona,”
kusho uMchunu.

UMchunu uthe
umphumela wophenyo
uzonekelwa iKhabhinethi
nomphakathi. “Okwa-
manje awukho umsebenzi
ozoqhubeka njengoba
sisafuna ukuphenya
ngezikhalo zabathile
mayelana nokulungiswa
komuzi,” kusho
uMchunu.

UPillay uthe u-R32
million okukhulunywa
ngawo yisabelo-mali
seminyaka eyisikhombisa
sokulungisa umuzi.

“Isabelo-mali
saqhamuka nethimba
lochwepheshe abenza
ucwaningo benza
isilinganiso sokuthi
umsebenzi ungabiza
malini,” kusho uPillay.

Uthe ukulungiswa
kwendlu kuhambisana
nemigomo yoMkhandlu
waMafa Heritage
mayelana nezakhiwo
ezineminyaka
engaphezulu

kwengu-60 wathi umuzi
usuneminyaka engu-137.

Isakhiwo sinomuzi,
izindawo ezimbili
okungahlalwa kuzona
uma kunemihlangano
nehhovisi labasebenzi.

ISOLEZWE
25 OCTOBER 2017
PAGE 10